

■ DA LA VITA DA LUDMILLA CAHENZLI

Tge trair en per ir a Tavau?

Tge! I va mo anc in'em-na fin al grond congress! Jau Ludmilla Cahenzli sun schoccada. Jau sun numnadamain schurnalista. Fin uss n'hai jau anc mai gughegià da darters quai en mias columnas. Ma igl è uschia. Ed jau hai per l'emprima giada dad ir a Tavau. En sasez sai jau quai gia daditg. E gia daditg pens'jau: «Quai va anc ditg.» Ma uss ruchegi, ed jau sent tuttenina la gnervusadad. Vul dir: Jau fatsch bunamain en las chautschas.

Tut quella gliעד renumada! Malgrà ch'jau inscuntr gnanca ina solia persuna renumada, sun jau total ord la suna.

Tge fa ina buna schurnalista en ina tala situaziun? Ella cumenza a sa preparar: studegiar las tractandas, rimnar material, guardar en l'internet, telefonar enturn.

In'otra pussaivladad da far insatge cunter la gnervusadad fiss: Far giu in termin tar la terapeuta e visualisar ensemen cun ella l'entira situaziun. Quai fiss fitg prudent.

Ma jau, Ludmilla Cahenzli, ma rend en chombra da durmir, avr stgaffas e truclets e tir navant mia vestgadira. Lain guardar! Jau fatsch in'exposiziun cun mias chautschas, rassas e blusas – insumma tut la vestgiadira che vegn en dumonda per Tavau. Lura vom jau per mes chalzers e mes stivalets, per giaccas e mantès. Suenter diesch minutas vesa mia chombra ora sco ina stizun da vestgadira.

Il maraton cumenza: Jau tir en tuttas cumbinaziuns pussaivlas. Suenter

duas uras hai jau empruvà tut. La situaziun è clera. Jau n'hai nagut da trair en.

Il problem èn las chautschas. Per il solit port jau jeans. Jeans èn sco mia segunda pel. Na, ellas èn anc pli impurtantas. Ellas èn forsa sco mia ossa, sco mes skelet. Jau hai il sentiment ch'jau na possia gnanca star sidretg senza jeans. Ma cun mias jeans isadas na dastg jau betg ir al congress. Nunpussai vel. Quels na ma laschan betg entrar. Ergo, jau dovr nova vestgadira.

Jau ma mett en mes auto, carresch sper mes biro ora e vom en mia stizun preferida. Là chatt jau immediat il deux-pièce cun chautschas ideal per quest intent. El sesa perfetg. Igl è in Boss per dunnas, sco fatg per quest'ocasiun. En quest deux-pièce vegn la lavur ad ir sco da sez. Mia detta vegn a saltar cun levezza sin la tastatura, sco diesch pitschnas ballarinas sin tribuna.

Sulet il pretsch dal deux-pièce è in zitg problematic. «Tgi sa sch'jau savess metter quai sin las spesas?» Ma jau crai ch'i crudass si, sche mias spesas fissan tuttenina 1800 francs pli autas che uschi-glio.

Ina stizun plinervi e trais categoria da pretschs plinengiu: Jau chatt chautschas – pli baud vess ins ditg knickerbockers – che giessan flot cun mes stivals da l'onni passà e cun mia giacca naira. Ma er quellas custan 187 francs, e damai che mes conto è puspè ina giada en il minus, renunz'jau.

En la stizun la pli bunmartgada chatt'jau

duas rassas. Taila fina, in stil in zitg festiv, scrittass giu. Ina per 49.80 francs e l'autra per 39.95. Ellas n'èn betg gist tenor mes gust, ma ellas van. Jau na fatsch betg lungas e paj.

Da charrar vers chasa quint'jau ora quants raps ch'jau hai spargnà cun las duas rassas cumpareglià cun il Boss per dunnas. 1710 francs hai jau spargnà.

Sper via è ina vitrina cun Sina blusa alva. Quella giess tiptop cun ina da mias novas rassas, pens jau. Uss ch'jau hai spargnà tants daners, pudess jau gea anc cumprar ina blusa.

Jau parchesch, entr en stizun e chatt svelto la blusa en la dretga grondezza. Enten ir tar la cabina croda mia egliada sin ina jeans. Ina fitg nobla. Ina fitg bella. Jau la prend entamaun e sun persa. Gnanca il pretsch ma po spender.

Diesch minutas pli tard bandun'jau la stizun cun in grond satg. El cuntogna la nobla jeans che fa dal reminent in bellezza tapun e la blus'alva che va perfetg tar la chautscha. (Da la situaziun sin mes conto na discurrinsa ussa betg.)

Mia gnervusadad è scuada davent. Jau ma legr dad ir a Tavau. En l'auto dun jau gas e sai uss tge che jeans muntan per mai. Ellas n'èn betg mia pel ed er betg mia ossa u mes skelet. Igl è blier meglier. Jeans che sesan bain èn sco in bun cuirass. Ellas protegian e fan ch'jau ma sent segira. Cun in bun cuirass san ins ir en mintga battaglia. Cun bunas jeans sin mintga congress.